



УЛСЫН ОНЦГОЙ КОМИССЫН  
ДАРГЫН ТУШААЛ

2021 оны 06 сарын 24 өдөр

Дугаар 51

Улаанбаатар хот

Түр журам шинэчлэн батлах тухай

Гамшгаас хамгаалах тухай хуулийн 27<sup>1</sup> дугаар зүйлийн 27<sup>1</sup>.1.1, 27<sup>1</sup>.1.4, Коронавируст халдвар (КОВИД-19)-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай хуулийн 8 дугаар зүйлийн 8.1.8 дахь заалтыг тус тус үндэслэн ТУШААХ нь:

1. "Гадаад улсаас ирсэн хүнийг тусгаарлан ажиглах үйл ажиллагааг зохицуулах түр журам"-ыг хавсралтаар шинэчлэн баталсугай.

2. Тушаалын хэрэгжилтэд хяналт тавьж ажиллахыг Улсын онцгой комиссын орлогч дарга /хошууч генерал Г.Ариунбуян/-д даалгасугай.

3. Түр журам батлагдсантай холбогдуулан Улсын онцгой комиссын "Түр журам батлах тухай" 2021 оны 43 дугаар тушаалын нэгдүгээр хавсралтыг хүчингүй болсонд тооцсугай.

ДАРГА



С.АМАРСАЙХАН

## ГАДААД УЛСААС ИРСЭН ХҮНИЙГ ТУСГААРЛАН АЖИГЛАХ ҮЙЛ АЖИЛЛАГААГ ЗОХИЦУУЛАХ ТҮР ЖУРАМ 0168

### Нэг. Нийтлэг үндэслэл

1.1.Тусгаарлан ажиглах үйл ажиллагааг зохицуулах түр журмын зорилго нь Коронавируст халдвар (КОВИД-19) /цаашид “коронавируст халдвар” гэх/-ын үед гадаад улсаас ирсэн хүн (Монгол Улсын болон гадаадын бүх насны хүн)-ийг тусгаарлах байранд тусгаарлан ажиглах үйл ажиллагааг зохион байгуулах, халдвараас сэргийлэх дэглэмийг мөрдүүлэх, холбогдох байгууллага, албан тушаалтан, тусгаарлагдсан хүний хүлээх үүрэг хариуцлагыг тогтооход оршино.

1.2.Тусгаарлан ажиглах үйл ажиллагаанд Гамшгаас хамгаалах тухай хууль, Коронавируст халдвар (КОВИД-19)-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай хууль болон бусад хууль тогтоомж, энэхүү журмыг мөрдлөг болгоно.

1.3.“Тусгаарлан ажиглах” гэж гадаад улсаас ирсэн хүнийг тусгай шаардлагын дагуу урьдчилан бэлтгэсэн байранд тусгаарлан ажиглах, төрийн болон нутгийн захиргааны байгууллагын хяналтад байлгахыг хэлнэ.

1.4.Тусгаарлан ажиглах үйл ажиллагааг улсын хэмжээнд Улсын онцгой комиссын Шуурхай штаб /цаашид “УОКШШ” гэх/, орон нутагт аймаг, сумын онцгой комиссын Шуурхай штаб /цаашид “АСШШ” гэх/ нэгдсэн удирдлага зохион байгуулалтаар хангана.

1.5.Тусгаарлан ажиглах үйл ажиллагаанд дараах зарчмыг баримтална:

- 1.5.1.хүний амь нас, эрүүл мэнд, аюулгүй байдлыг хангах;
- 1.5.2.хууль дээдлэх, хүний эрхийг хангах;
- 1.5.3.шуурхай, ил тод байх;
- 1.5.4.хувь хүний нууцыг чанд хадгалах;
- 1.5.5.байгууллага хоорондын хамтын ажиллагааг хангах;
- 1.5.6.авлига, ашиг сонирхлын зөрчлөөс ангид байх;
- 1.5.7.тусгаарлан ажиглах байрны нэг өрөөнд нэг хүн, нэг гэр бүлийн гишүүд, асран хамгаалагч, харгалзан дэмжигч, хамтран амьдрагчийг хамтад нь байрлуулах;

1.6.Тусгаарлан ажиглах үйл ажиллагааны баримт бичгийг хуулийн этгээд бусдад шилжүүлэх, дамжуулахдаа цахим гарын үсэг хэрэглэнэ.

### Хоёр. Тусгаарлан ажиглалтын хугацаа, зохион байгуулалт, шинжилгээ

2.1. Гадаад улсаас ирэх хүнийг Монгол Улсад ирэх өдрийг урьдчилан тооцож ямар ч тохиолдолд заавал 72 цагийн хүчинтэй бх-ПГУ-ын шинжилгээний “сөрөг” хариунд үндэслэн нислэгт багтаах бөгөөд үүнийг зөрчсөн тохиолдолд халдварын эрсдэлээс үүсэн гарах бүх зардал, хариуцлагыг тухай тээвэрлэгч байгууллага, хувь иргэн бүрэн хүлээнэ.

2.2.Дараах тохиолдолд гадаад ирж байгаа хүнийг тусгаарлан ажиглах байранд тусгаарлана:

2.2.1.коронавируст халдварын эсрэг вакцинжуулалтад огт хамрагдаагүй, вакцинжуулалтын бүрэн тун хийлгээгүй, вакцинжуулалтын бүрэн тун хамрагдсанаас хойш 14 хоног болоогүй хүнийг 7 хоног;

2.2.2.гадаад улсад зорчсон нисэх баг, төмөр замын зүтгүүрийн болон авто тээврийн бүрэлдэхүүн хил нэвтэрсэн, хил нэвтрээгүй боловч хяналт тавьсан улсын байцаагч халдвараас сэргийлэх дэглэм зөрчсөн гэж дүгнэвэл тус баг, бүрэлдэхүүнийг 7 хоног;

2.2.3.Эрүүл мэндийн асуудал эрхэлсэн төрийн захиргааны төв байгууллагаас “Анхаарал татаж буй хувилбарын мутацлагдсан вирус голомтлон бүртгэгдэж байгаа

гадаад улс, орны жагсаалт"-ыг батлах бөгөөд тухайн жагсаалтад багтсан гадаад улсад 14 хоногийн өмнө оршин сууж байсан, 14 хоногийн дотор дамжин өнгөрсөн хүнийг коронавируст халдварын эсрэг вакцинжуулалтын бүрэн тун хийлгээд 14 хоног өнгөрсөн, өвчилж эдгэрсэн эсэхээс үл хамааран нас харгалзахгүй ямар ч тохиолдолд 14 хоног;

2.3.Энэ журмын 2.2.3-т зааснаас бусад улсаас ирж байгаа Монгол Улсаас гадаад улсад сугаа дипломат төлөөлөгч, олон улсын байгууллагын суурин төлөөлөгч, ажилтан болон тэдгээрийн өөрийн гэр бүлийг Гадаад хэргийн асуудал хариуцсан төрийн захиргааны төв байгууллагын хяналт дор гэрийн ажиглалтад, Монгол Улсад суугаа дипломат төлөөлөгч, олон улсын байгууллагын суурин төлөөлөгч, ажилтан болон тэдгээрийн гэр бүлийг тухайн улсын дипломат төлөөлөгчийн газрын тусгайлан бэлтгэсэн байранд 7 хоног тусгаарлаж болно.

2.4.Тусгаарлан ажиглах байранд 7 хоног тусгаарлагдаж байгаа хүнээс 6 дахь хоногт 1 удаа, 14 хоног тусгаарлагдаж байгаа хүнээс 6, 12 дахь хоногт 2 удаа бх-ПГУ шинжилгээг авах ажлыг нийслэлд Халдварт өвчин судлалын үндэсний төв /ХӨСҮТ/, нийслэлийн Эрүүл мэндийн газар, орон нутагт харьяа Эрүүл мэндийн байгууллага зохион байгуулна.

2.5.Тусгаарлан ажиглах байранд тусгаарлагдах хугацаа дууссан, эмнэлзүйн шинж тэмдэг илрээгүй, бх-ПГУ шинжилгээний хариу "сөрөг" гарвал 7 хоног гэрийн ажиглалтад шилжүүлнэ.

2.6.Тусгаарлан ажиглах байранд тусгаарлагдах хугацаанд коронавируст халдварын тохиолдол батлагдвал эмнэлэгт шилжүүлнэ.

2.7.Дараах тохиолдолд хүнийг холбогдох нотлох баримтыг үндэслэн тусгаарлан ажиглах байранд тусгаарлахгүй гэрийн ажиглалтад шилжүүлнэ:

2.7.1.коронавируст халдварын эсрэг вакцинжуулалтын бүрэн тунд хамрагдсанаас хойш 14 хоногийн хугацаа өнгөрсөн;

2.7.2.сүүлийн 4 сарын хугацаанд коронавируст халдвараар өвчилж, эдгэрсэн;

2.7.3.энэ журмын 2.7.1, 2.7.2-т заасан хүнтэй хамт зорчиж байгаа өөрийн гэрийн бүлийн болон асран халамжинд байгаа 18 хүртэлх насны хүүхэд;

2.7.4. эрүүл мэндийн хүндэтгэн үзэх шалтгаантай хүнийг холбогдох эрүүл мэндийн байгууллагын дүгнэлтийг үндэслэн УОКШШ-ын зөвшөөрснөөр;

2.8.Тусгаарлан ажиглах байранд тусгаарлагдахгүй иргэн вакцинжуулалтын бүрэн тунд хамрагдсан, эмчлүүлж эдгэрсэн талаарх нотломжоо үнэн зөв гаргаж өгөх үүрэг хүлээнэ.

2.9.Тусгаарлан ажиглах байранд эрүүл мэнд, онцгой байдал, цагдаагийн байгууллагын алба хаагч, зохион байгуулагч, үйлчилгээний ажилчид үүрэг гүйцэтгэнэ.

2.10.Тусгаарлан ажиглах байранд үүрэг гүйцэтгэх үед батлагдсан тохиолдол бүртгэгдээгүй бол вакцинжуулалтын бүрэн тунд хамрагдаагүй, бүрэн тунд хамрагдсанаас хойш 14 хоног өнгөрөөгүй албан хаагч, тусгаарлах байрны ажилчдаас бх-ПГУ шинжилгээ авч "сөрөг" хариу гарвал гэрийн ажиглалтад 7 хоног шилжүүлнэ.

2.11.Тусгаарлан ажиглах байранд үүрэг гүйцэтгэх үед батлагдсан тохиолдол бүртгэгдсэн бол ажилласан төрийн албан хаагч, тусгаарлах байрны ажилчдыг үргэлжлүүлэн ажиллуулах, тусгаарлан ажиглах байр руу шилжүүлэх эсэхийг тандалтын багийн дүгнэлтийг үндэслэн тухайн шатны Онцгой комиссын Шуурхай штаб шийдвэрлэнэ.

2.12.Иргэнийг тусгаарлан ажиглах байранд хамгаалан хүргэх, хүлээлгэн өгөх ажлыг Цагдаагийн байгууллагын хамгаалалт дор зохион байгуулна.

2.13.Тусгаарлан ажиглах байранд үүрэг гүйцэтгэж байгаа төрийн албан хаагч, ажилтнаас эмнэлзүйн шинж тэмдэг илэрсэн, эсвэл шинжилгээний "ээрэг" хариу гарсан тохиолдолд тусгаарлан ажиглах байрнаас бусад хүнийг гаргахыг тандалтын багийн дүгнэлтийг үндэслэн тухайн шатны ОКШШтаб шийдвэрлэнэ.

## **Гурав. Тусгаарлан ажиглах байр, түүнд тавигдах шаардлага**

3.1. Тусгаарлан ажиглах байрыг дараах эрэмбээр сонгоно:

3.1.1. зочид буудал,

3.1.2. амралтын газар, сувилал,

3.1.3. гадаад улсаас Монгол Улсад суугаа дипломат төлөөлөгчийн газрын байр.

3.2. Тусгаарлан ажиглах байрыг сонгох ажлын хэсгийг нийслэлд дүүргийн Онцгой комиссын даргын тушаалаар, орон нутагт аймаг, сумын Онцгой комиссын даргын тушаалаар томилно.

3.3. Хуулийн этгээд нь энэ журмын 3.1-т заагдсан байрыг тусгаарлан ажиглах байрын зориулалтаар ашиглуулах хүсэлтээ ажлын хэсэгт гаргана. Ажлын хэсэг нь уг хүсэлтийг судлан үзэж, энэхүү журмын 3 дахь хэсэгт заасан шаардлагад нийцсэн объектыг тусгаарлан ажиглах байраар сонгоно.

3.4. Сонгогдсон байрны дүгнэлт, дэлгэрэнгүй мэдээллийг ажлын хэсгээс УОКШШ, аймгийн Онцгой комиссын Шуурхай штабт хүргүүлнэ.

3.5. Тусгаарлан ажиглах байрны эзэмшигчтэй байгуулах гэрээний загварыг онцгой байдлын байгууллага боловсруулж, санхүүгийн төлбөр тооцооны гүйцэтгэлд хяналт тавина.

3.6. Тусгаарлан ажиглах байр нь дараах шаардлагыг хангасан байна:

3.6.1. цахилгаан, дулаан, усан хангамж, ариутгах татуургын төвлөрсөн болон хэсгийн системд холбогдсон, галын аюулгүй байдал, эрүүл ахуйн нөхцөл, шаардлагыг хангасан байх;

3.6.2. ундны усны хэсгийн систем, эх үүсвэр, хэрэглээний шугамын усанд мэргэжлийн хяналтын байгууллагаар нян судлалын шинжилгээг хийлгэж, дүгнэлт гаргуулсан байх;

3.6.3. цонхны салхивчийг нээх боломжтой, эсвэл агааржуулалтын системтэй, насанд хүрээгүй иргэний аюулгүй байдлыг хангасан байх;

3.6.4. өрөө тус бүр гар угаах нөхцөлөөр хангагдсан бие засах ариун цэврийн өрөөтэй, нэг өрөөнд энэ журамд заасан нөхцөлөөр иргэнийг хамт тусгаарласан тохиолдолд ор хоорондын зайг нэг метрээс доошгүй байх;

3.6.5. эрүүл мэнд, онцгой байдал, цагдаагийн алба хаагчийн байрлах өрөө нь гар угаах, усанд орох, бие засах нөхцөлөөр хангагдсан эсвэл гар угаах, усанд орох хэсэг нь ажиглалтад байгаа иргэнээс тусдаа байхаар зохион байгуулагдсан байх;

3.6.6. хяналтын камер, зарлан мэдээлэх төхөөрөмжийг давхар бүрт бүрэн хянах боломжтойгоор байрлуулсан, камерын бичлэг нь тусгаарлалтын нэг ээлжийн бичлэгийг бүрэн хадгалах хүчин чадалтай байх;

3.6.7. албан хаагчдын амрах, хоол үйлдвэрлэх, сэжигтэй тохиолдлыг түр тусгаарлах, цэвэрлэгээний материал, угааж халдваргүйжүүлж, хадгалах өрөө, хамгаалах хувцас өмсөж, тайлах хэсэгтэй байх;

3.6.8. тусгаарлагдаж байгаа хүн, үүрэг гүйцэтгэж буй ажилтныг чанар, эрүүл, аюулгүй байдлын шаардлага хангасан хоол, хүнсээр хангах боломжтой байх.

3.6.9. өрөө бүрт дараах эд зүйлийг урьдчилан бэлтгэж байршуулсан байх:

а/ариун цэврийн цаас, гарын болон эдийн саван, аяга, таваг угаагч шингэн, цэвэрлэгээний алчуур (гал тогооны, тоосны, шалны), өрөө, тасалгаа, ариун цэврийн өрөөнд хэрэглэх угаалга, цэвэрлэгээний бодис, хогийн сав, хар, шар өнгийн хогийн уут,

б/"Эмнэлзүйн шинж тэмдэг тандах хуудас", халуун хэмжигч (эмнэлгийн ажилтан халуун хэмжихээр зохицуулсан бол шаардлагагүй), эмч мэргэжилтэнтэй холбоо барих утасны жагсаалт, ажиглалтын үед мөрдөх санамж, гал түймэр болон ослын үед ашиглах аврах гарцын бүдүүвч зураг, хориглох зүйлсийн анхааруулга, цэвэрлэгээний зааварчилгаа, хог гаргах цагийн хуваарь.

в/хаалганы гадна талд хоол, эргэлтийн эд зүйлсийг тавих ширээ (сандаал, шүүгээ)

3.7. Энэ журмын 3.6.1-д заасан нөхцөл, шаардлага сум, тосгонд хамаарахгүй байж болно.

3.8. Хэсгийн усан хангамжтай тусгаарлан ажиглах байрны усны эх үүсвэр, ус түгээгүүрийн шугам сүлжээ, ус нөөцлөх санд холбогдох журмын дагуу хамгаалалтын бүс

тогтоож, бохирдолтоос хамгаалах арга хэмжээг авч, эрүүл ахуйн аюулгүй байдлыг хангана.

3.9.Зөөврийн усан хангамжтай тусгаарлан ажиглах байрны эх үүсвэрийн ус нөөцлөх савыг сэрүүний улиралд 3 сар, дулааны улиралд сар тутам, ус зөөвөрлөх хадгалах савыг долоо хоногт 2-оос доошгүй удаа угааж цэвэрлэн, халдваргүйжүүлнэ.

3.10.Хувцас тайлах хэсэгт толь, хамгаалах хувцас тайлах дарааллыг харуулсан зурагт хуудас, 50 литрээс дээш хэмжээтэй "Био аюултай" гэсэн тэмдэглэгээтэй шар өнгийн хогийн уут бүхий "хөл ажиллагаа"-тай хогийн сав зэргийг байрлуулсан байх.

3.11.Тусгаарлан ажиглах байрыг халдвартай-"улаан", халдварын эрсдэл дунд буюу завсрын-"шар", халдваргүй-"ногоон" гэсэн гурван бүсээр хуваана.

3.12.Тусгаарлах байрны хяналтын камерны дэлгэцийг тухайн байрны "ногоон бүс"-д байрлуулна.

3.13.Эмч мэргэжилтэн, бусад алба хаагчийн байрлах өрөө, хувийн хамгаалах хувцас, хэрэгсэл тайлах хэсэг, гал тогооноос тусгаарлан ажиглах өрөөнд хоол зөөвөрлөх, хоолны хэрэгслийг гал тогоонд хүргэх болон хог хаягдлыг зөөвөрлөх чиглэл зэрэг орох, гарахыг хориглосон хэсэгт нэг чигийн урсгалаар хөдөлгөөнийг давхцуулахгүй байхаар анхааруулах тэмдэг, тэмдэглэгээ байрлуулна.

3.14.Тусгаарлан ажиглах байрыг цагдаагийн байгууллагын хамгаалалтад авах бөгөөд гэрээт харуул хамгаалалт, камерын бүрэн хяналт бүхий тусгаарлан ажиглах байрны гадна орчинд цагдаагийн хамгаалалт гаргахгүй.

## **Дөрөв. Улсын болон аймаг, нийслэл, сум, дүүргийн онцгой комиссын Шуурхай штабын эрх, үүрэг**

### **4.1.Улсын онцгой комиссын Шуурхай штаб дараах эрх, үүргийг хэрэгжүүлнэ:**

4.1.1.Нийслэлд тусгаарлан ажиглах байрны бэлтгэлийг хангуулах;

4.1.2.тусгаарлах байранд ажиллах эрүүл мэнд, онцгой байдал, цагдаагийн байгууллагын ажилтны мэдээллийг холбогдох байгууллагуудаас авч нэгтгэн, ажиллах хүчний нөөцийг төлөвлөх;

4.1.3.тусгаарлан ажиглах байранд байгаа хүн /бага насны хүүхэд, тусгай хоолны дэглэмтэй иргэн/-д олгох хоолны жишиг цэсийг хоногийн хоол хүнсээр авбал зохих илчлэг, үндсэн шимт бодис, аминдэм, эрдэс бодисын зөвлөмжийн хэмжээнд нийцүүлэн мэргэжлийн байгууллагатай хамтран боловсруулж, батлуулах бөгөөд тусгаарлан ажиглах байрны менежерт хүргүүлэх;

4.1.4.тусгаарлан ажиглах байрны удирдлага, ажилтан, эрүүл мэнд, онцгой байдал, цагдаагийн алба хаагчдад халдвараас сэргийлэх дэглэм, гүйцэтгэх үүрэг, дэг журам сахиулахтай холбоотой сургалтыг сар бүр зохион байгуулж, ажлын хариуцлагад хяналт тавьж, илэрсэн зөрчлийг арилгуулах;

4.1.5.авто болон төмөр замын боомтоор татан авах иргэдийн нэрийн жагсаалтыг Монгол Улсаас Оросын Холбооны Улс, Бүгд Найрамдах Хятад Ард Улсад суугаа Дипломат төлөөлөгчийн газар болон бусад холбогдох байгууллагаас урьдчилан авах;

4.1.6.гадаад улсаас ирэх иргэн вакцинжуулалтын бүрэн тун авсан эсэх мэдээллийг Дипломат төлөөлөгчийн газар, агаарын тээврийн компани болон автозам, төмөр замын боомтоор орж ирэх үед хил хамгаалах байгууллагаар дамжуулан авах;

4.1.7.гадаад улсаас иргэдийг татан авах ажиллагааны төлөвлөгөөг тухай бүр боловсруулж, батлах;

4.1.8.тусгаарлан ажиглах байрны өрөө, тасалгаа тус бүрийн зай, орны тоог нарийвчлан судалж, иргэдийг байршуулах хуваарийг урьдчилан төлөвлөх ба батлагдсан тохиолдолдын ойрын хавьтал, эрүүл мэндийн байгууллагын ажилчид болон гадаад улсаас ирж байгаа иргэдийг нэг тусгаарлан ажиглах байранд хамтад нь тусгаарлахгүй байх;

4.1.9.тусгаарлан ажиглах байрны онцлог, багтаамж, давхар, өрөө тасалгаа, орны тоо, зохион байгуулалт, иргэний тооноос хамаарч тухайн байранд ажиллах алба хаагчдыг хуваарилах;

4.1.10.гадаад улсаас ирж буй эрүүл мэндийн шалтгаантай зорчигчийг урьдчилан бэлтгэсэн эмнэлэг, бусад зорчигчийг тусгаарлан ажиглах байранд тээвэрлэн хүргэх тээврийн хэрэгслийг бэлтгэх;

4.1.11.тусгаарлан ажиглах байранд зайлшгүй шаардлагаар нэвтрэх ажилтан, албан хаагчдад /төрөлжсөн мэргэшлийн эмч мэргэжилтэн, өргөдөл, гомдлоор шалгалт хийх мэргэжлийн хяналтын улсын байцаагч, хэв журам сахиулах цагдаагийн алба хаагч, тусгаарлах байрны үйлчилгээ, цахилгаан, ус дулаан хангамж, мэдээлэл холбооны г.м/ зөвшөөрөл олгох;

4.1.12.тусгаарлан ажиглах байрны нөхцөл, дэг журам, эрүүл мэнд, хоол хүнсний асуудлаар гаргасан гомдол, мэдээллийг шалгаж шийдвэрлэх;

4.1.13.тусгаарлан ажиглах байрыг орчин нөхцөл, үйлчилгээний чанар, төлбөрийн нөхцөлөөс хамааруулан 3 зэрэглэлд ангилсан судалгаа гаргаж, тусгаарлагдах хүнд санал болгох;

4.1.14.АСШШ-ыг удирдлага, зохион байгуулалтаар хангаж, мэргэжил арга зүйн зөвлөгөө, үүрэг, чиглэл өгч биелэлтийг хангуулах;

4.1.15.удаа дараа зөрчил дутагдал гаргасан аж ахуйн нэгж, байгууллагыг тусгаарлан ажиглах байраар ажиллуулахгүй байх шийдвэрийг гаргаж, гэрээг цуцлах, гарсан хохирлыг нөхөн төлүүлэх санал гаргах;

4.1.16.тусгаарлан ажиглах байранд ажиллаж буй онцгой байдлын алба хаагчаас ажиглалт хийж буй иргэний шилжилт хөдөлгөөний тоон мэдээ, эрүүл мэндийн ажилтнаас дэлгэрэнгүй бүртгэлийг өдөр бүр авч нэгтгэн, мэдээллийн санг баяжуулж, дүн шинжилгээ хийх;

4.1.17.тусгаарлан ажиглах байрнаас гэрийн тусгаарлалтад шилжих хүний бх-ПГУ шинжилгээний "сөрөг" гарсан сүүлийн хариуг ХӨСҮТ-өөс 11.00 цагаас өмнө албан бичиг эсвэл цахимаар авч, энэ талаар тусгаарлан ажиглах байрны хамгаалалтын ажилтанд мэдэгдэх;

4.1.18. Коронавируст халдвараар өвчилж, эмнэлэгт болон гэрээр эмчлэгдэж эдгэрсэн хүнд тухайн эмнэлгийн болон өрхийн эрүүл мэндийн төв эдгэрсэн талаарх магадлагаа гаргаж өгнө.

## **4.2. Аймаг, нийслэл, сум, дүүргийн Шуурхай штаб дараах эрх, үүргийг хэрэгжүүлнэ:**

4.2.1.тусгаарлан ажиглах байрыг энэхүү журмын 3.6-д тавигдах шаардлагад нийцүүлэн сонгох, бэлтгэлийг хангуулах;

4.2.2.байрны онцлог, багтаамж, давхар, өрөө тасалгаа, орны тоо, зохион байгуулалт, иргэний тооноос хамаарч тухайн байранд ажиллах алба хаагчдыг хуваарилах;

4.2.3.тусгаарлан ажиглах байрны удирдлага, ажилтан, алба хаагчдад сургалт зохион байгуулж, мэдээллээр хангах;

4.2.4.сэжигтэй тохиолдол болон эрүүл мэндийн шалтгаантай зорчигчийг эрүүл мэндийн байгууллагад, бусад зорчигчийг урьдчилан бэлтгэсэн тусгаарлан ажиглах байранд тээвэрлэн хүргэх тээврийн хэрэгслийг бэлтгэх;

4.2.5.тусгаарлан ажиглах байрнаас гэрийн тусгаарлалтад шилжих иргэнийг халдвараас сэргийлэх дэглэм, хөдөлгөөний аюулгүй байдлыг хангаж тээвэрлэх ажлыг зохион байгуулах;

4.2.6.хилийн боомтоор нэвтэрсэн хүнийг тухайн нутаг дэвсгэрт тусгаарлах арга хэмжээг зохион байгуулах.

### **Тав. Хилийн нэвтрэх цэгт авч хэрэгжүүлэх арга хэмжээ**

5.1.УОКШШ-аас ирүүлсэн нэрсийн жагсаалтын дагуу улсын хилийн боомтоор татан авч буй зорчигчдыг тусгаарлан ажиглалтад шилжүүлэх, эрэмбэлэн ангилах төлөвлөлтийг хилийн мэргэжлийн хяналтын алба хийнэ.

5.2.Хилийн мэргэжлийн хяналтын алба, хэлтсээс сэжигтэй зорчигчийн мэдээллийг нийслэлд ХӨСҮТ, орон нутагт Эрүүл мэндийн байгууллагад өгнө.

5.3.Зорчигчдод эрүүл мэндийн тандалт судалгаа хийж, эрэмбэлэн ангилна.

5.4.Зорчигчийн ачаа, гар тээшийг тусгайлан бэлтгэсэн байранд мэргэжлийн байгууллага халдваргүйжүүлнэ.

5.5.Хил хамгаалах байгууллагын ажилтан нь халдвар хамгааллын дэглэмийг баримтлан зорчигчийн биеийн байцаалтыг шалган, улсын хилээр нэвтрэх зөвшөөрөл олгоно.

5.6.Халдварын сэжигтэй зорчигчийг бусад зорчигчоос түр тусгаарлан, ойрын хавьтлуудын хамт эрүүл мэндийн байгууллагын шуурхай хариу арга хэмжээний багт тэмдэглэл үйлдэн шилжүүлнэ.

5.7.Шуурхай штабаас урьдчилан ирүүлсэн нэрсийн жагсаалтын дагуу бусад зорчигчийг тээврийн хэрэгсэлд суулгаж цагдаагийн хамгаалалтад шилжүүлнэ.

5.8.Агаарын тээврийн компаниуд нь гадаад улсаас ирэх иргэний дархлаажуулалтын бүрэн тун авсан эсэх мэдээллийг УОК-ын Шуурхай штабт хүргүүлнэ.

5.9.Монгол Улсад ажиллах нөхцөлтэйгээр болон урилгаар ирж байгаа гадаад иргэний шинжилгээний төлбөрийг тухайн иргэн, аж ахуйн нэгж, байгууллага хариуцна.

### **Зургаа. Тусгаарлан ажиглах байр (хуулийн этгээд), түүнд ажиллагсдын үүрэг**

#### **6.1.Тусгаарлан ажиглах байрыг хариуцаж буй хуулийн этгээд дараах үүрэг хүлээнэ:**

6.1.1.тусгаарлагдах хүмүүсийн мэдээллийг улсын болон аймаг, нийслэл, сум, дүүргийн Шуурхай штабаас урьдчилан авч, тусгаарлан ажиглах байрыг бэлтгэж, бэлэн байдлыг хангах;

6.1.2.тусгаарлан ажиглах байрны байршил, давхар, өрөө, тасалгаа, нийт орны тоогоор зураглал гаргаж улсын болон аймаг, нийслэл, сум, дүүргийн Шуурхай штабт хүргүүлэх;

6.1.3.тусгаарлан ажиглах байрны цахилгаан, халаалт, усан хангамж, ариутгах татуурга, цэвэрлэгээ, халдваргүйжүүлэлт, хог хаягдлын цуглуулалт, зайлуулалтын тасралтгүй байдлыг хангах;

6.1.4.тусгаарлагдсан хүн, ажиллагсдын хоол, хүнсний нийлүүлэлт, тээвэрлэлт, хадгалалт, үйлдвэрлэл, үйлчилгээнд хяналт тавьж, хоол, хүнс, үйлчилгээнийхээ чанар, аюулгүй байдлыг хангах, ажиллагсдыг эрүүл мэндийн урьдчилан сэргийлэх үзлэг, шинжилгээнд хамруулах;

6.1.5.улсын бүртгэлд бүртгэгдсэн, хаяг шошгын зөрчилгүй, хэрэглэх заавар тодорхой халдваргүйжүүлэх бодисоор батлагдсан зааврын дагуу угаалга, цэвэрлэгээг тогтмол хийх;

6.1.6.тусгаарлах байранд ажиллах ажилтнуудын хувийн бэлтгэлийг бүрэн хангуулж, ээлж солихгүйгээр ажиллуулах;

6.1.7.хүнсний түүхий эд, бүтээгдэхүүн, хоол үйлдвэрлэлд эрүүл мэндийн урьдчилан сэргийлэх үзлэг болон бх-ПГУ шинжилгээнд бүрэн хамрагдсан тогооч, ажилтныг ажиллуулна. Хэрэв вакцинжуулалтын бүрэн тун хийлгэж, 14 хоногийн хугацаа өнгөрсөн, сүүлийн 4 сарын дотор өвчлөөд эдгэрсэн бол бх-ПГУ шинжилгээ шаардахгүй.

6.1.8.тусгаарлан ажиглах байранд үүрэг гүйцэтгэх эрүүл мэнд, онцгой байдал, цагдаагийн алба хаагчдын тавьсан хууль ёсны шаардлагыг биелүүлэх;

6.1.9.тусгаарлан ажиглах байранд сэжигтэй тохиолдол илэрсэн үед хэрэглэх иж бүрэн хувийн хамгаалах хувцас, хэрэгсэл (комбинзон, N95 амны хаалт, нүдний шил, нүүрний хаалт, бээлий, малгай, гутлын гадуурх улавч зэрэг)-ийн нөөцийг бэлтгэх;

6.1.10.тусгаарлан ажиглалтад байгаа иргэний мэдээлэл, хувь хүний нууцыг эрх бүхий байгууллага, албан тушаалтнаас бусдад задруулахгүй байх;

6.1.11.тусгаарлагдсан хүн гарсны дараа байр, өрөөнд цэвэрлэгээ, халдваргүйжүүлэлт хийж дараагийн хүнийг хүлээн авах бэлтгэлийг хангах;

6.1.12.нэг ээлжийн тусгаарлан ажиглалтын хугацаа дуусмагц 2 хоногийн дотор хяналтын камерын бичлэгийн хуулбарыг тагнуул, цагдаагийн байгууллагад шилжүүлэх.

## **6.2.Тусгаарлан ажиглах байрны гал тогооны ажилтан дараах үүрэг хүлээнэ:**

6.2.1.шуурхай штабаас боловсруулсан жишиг цэсэд нийцүүлэн 7 хоногийн хоолны цэс, технологийн картыг боловсруулж, байгууллагын удирдлагаар батлуулж, мөрдөж ажиллах;

6.2.2.хоол үйлдвэрлэлийг явуулахдаа эрүүл ахуйн нөхцөл, шаардлагыг сайтар хангах;

6.2.3.эрүүл ахуй, аюулгүй байдлын шаардлага хангасан, гарал үүсэл нь тодорхой, баталгаажилттай хүнсний түүхий эд, бүтээгдэхүүнийг хоол үйлдвэрлэлд ашиглаж, ул мөрийг мөрдөн тогтоох бүртгэлийг тогтмол хөтлөх;

6.2.4.бэлтгэсэн хоол, хүнсний цуврал бүрээс 150 гр-аас доошгүй дээжийг ариутгасан саванд авч битүүмжлэн хаяглаж, 4°C-ийн хэмд, 72 цагаас багагүй хугацаанд хадгалж, бүртгэл хөтөлсний дараа устгах;

6.2.5.хоолны сав, хэрэгслийг 2 хувийн содын уусмал эсвэл зориулалтын угаагч бодисоор цэвэрлэж, халдваргүйжүүлэх;

6.2.6.хоолыг зориулалтын халуун баригч бүхий битүүмжлэлтэй саванд хийж, зөөвөрлөх;

6.2.7.хоол зөөх тэргэнцэрийг 0.015 хувийн жавелион эсвэл хлор агуулсан бусад бодисоор тогтмол халдваргүйжүүлэх;

6.2.8.тусгаарлах байранд ажиллаж буй бусад албан хаагч, ажилтантай шууд харьцахгүй, гал тогооноос бусад хэсэгт зорчихгүй байж, халдвараас сэргийлэх дэглэмийг чанд мөрдөх;

6.2.9.хүнсний түүхий эд, бүтээгдэхүүнийг гардан боловсруулдаг, үйлдвэрлэдэг, тээвэрлэдэг ажилтан эрүүл мэндийн урьдчилан сэргийлэх үзлэг, шинжилгээнд 6 сар тутамд бүрэн хамрагдах;

6.2.10.өөрийн эрүүл мэндийн байдал, биеийн халуунд өдөр бүр хяналт тавьж, өвчний шинж тэмдэг илэрсэн тохиолдолд тусгаарлах байрны эмч мэргэжилтэнд яаралтай мэдэгдэх.

## **6.3.Тусгаарлан ажиглах байрны үйлчилгээний ажилтан дараах үүрэг хүлээнэ:**

6.3.1.халдваргүйжүүлэх бодисыг найруулах арга, хэрэглээний талаарх сургалтад хамрагдах;

6.3.2.тусгаарлан ажиглалтад байгаа хүн шал болон бусад гадаргуу дээр бөөлжсөн, суулгасан тохиолдолд шингэнийг нэг удаагийн цаасан алчуураар шингээж авах, бүхэл хэсгийг хутгуур ашиглан хамж авсны дараа угаалгын бодистой халуун усаар угааж цэвэрлэн шалыг 0.015 хувь, ариун цэврийн өрөөг 0.03 хувийн жавелионы уусмал эсвэл хлор агуулсан бусад бодисоор халдваргүйжүүлэх;

6.3.3.цэвэрлэгээ, үйлчилгээ хийх, хог хаягдал цуглуулах үедээ нэг удаагийн халат, малгай, нүдний шил эсвэл нүүрний хаалт, нэг удаагийн амны хаалт хэрэглэх, нэг удаагийн бээлий дээр цэвэрлэгээний зузаан бээлий өмсөх;

6.3.4.хамгаалах хувцас, хэрэгслийг өмсөхийн өмнө, тайлсны дараа, ариун цэврийн өрөөнд орсны дараа, хоол идэхийн өмнө, цэвэрлэгээ, үйлчилгээ хийсний дараа гараа тогтмол угааж халдваргүйжүүлэх;

6.3.5.өрөөний үүдэнд гаргасан хатуу хог хаягдлыг тогтоосон цагийн хуваарийн дагуу цуглуулж, хог хаягдлын цэгт хүргэх;

6.3.6.халдвартай хог хаягдлыг шар өнгийн уутанд цуглуулан зөөвөрлөн түр хадгалах хэсэгт хүргэх, цэвэрлэгээ, үйлчилгээний дараа хамгаалах хувцас, хэрэгслийг зааврын дагуу тайлах;

6.3.7.тусгаарлан ажиглах өрөөний хаалганы гадна талын бариул, хонх, коридорын шал, явган хүний болон цахилгаан шат зэрэг хүний гар байнга хүрэлцэх гадаргууг өдөр бүр цэвэрлэж, халдваргүйжүүлэх;

6.3.8.цахилгаан шат, хаалганы дээд хэсэг, коридорын болон хүлээлгийн танхимын гар хүрэхгүй хэсгийг зориулалтын бодисоор шүршиж халдваргүйжүүлэх;

6.3.9.хувийн хамгаалах хувцас, хэрэгслийг тайлахгүйгээр өөрийн амрах байр болон бусад хэсгүүдэд зорчихгүй байх.

#### **6.4. Тусгаарлан ажиглах байранд ажиллаж буй эрүүл мэндийн ажилтан дараах үүрэг хүлээнэ:**

6.4.1.ажил үүрэг гүйцэтгэхтэй холбоотой хууль тогтоомж, эрх зүйн акттай урьдчилан танилцаж, өдөр тутмын үйл ажиллагаандаа мөрдөж ажиллах;

6.4.2.тусгаарлан ажиглах байрны өрөө, орны тоо, хуваарилалтад хяналт тавьж байршлаар нарийвчлан гаргасан судалгааны дагуу иргэнийг байрлуулах, халдвараас сэргийлэх дэглэмийг дагаж мөрдөх талаар заавар, зөвлөмж өгч тэмдэглэл үйлдэх;

6.4.3.ажиллаж буй төрийн албан хаагч болон ажилтнуудад халдвараас сэргийлэх дэглэмийн зааварчилгаа өгч, удирдан зохион байгуулах;

6.4.4.тусгаарлан ажиглах байранд байгаа иргэнд шаардлагатай тохиолдолд эмнэлгийн анхны яаралтай тусламж үзүүлсэн бол "яаралтай тусламжийн хуудас"-ыг хөтлөн, эм, эмнэлгийн хэрэгслийн зарлагыг тухай бүр бүртгэнэ.

6.4.5.тусгаарлагдсан хүнээс батлагдсан загварын дагуу "Эмнэлзүйн шинж тэмдэг тандах хуудас" бөглүүлж авах;

6.4.6.тусгаарлан ажиглалтад байгаа хүний биеийн халууныг өдөрт 2-оос доошгүй удаа хэмжиж, эмнэл зүйн шинж тэмдэг илэрч байгаа эсэх тухай тэмдэглэл хөтлөх;

6.4.7.өөрийн болон бусад (үйлчилгээний болон онцгой байдал, цагдаагийн) алба хаагчийн эрүүл мэндийн байдалд хяналт тавьж, өдөр бүр биеийн халууныг хэмжиж, эмнэл зүйн шинж тэмдэг илэрч байгаа эсэх тухай тэмдэглэл хөтлөх;

6.4.8.тусгаарлан ажиглах байр болон өрөөнд зайлшгүй шаардлагаар нэвтэрч байгаа эмч мэргэжилтэн, бусад ажилтны талаарх мэдээллийг тухай бүр бүртгэж, тэмдэглэл хөтлөх;

6.4.9.хоол түгээх, биеийн халуун хэмжих, эмнэлгийн тусламж, үйлчилгээ үзүүлэх үед нэг удаагийн халад, малгай, эмнэлгийн амны хаалт, үзлэгийн бээлий, гутлын гадуурх улавч хэрэглэх;

6.4.10.коронавируст халдварын сэжигтэй тохиолдол илэрсэн үед иж бүрэн хувийн хамгаалах хувцас, хэрэгсэл (комбинзон, N95 амны хаалт, нүдний шил, нүүрний хаалт, бээлий, малгай, гутлын гадуурх улавч зэрэг)-ийг өмсөж эмнэлгийн тусламж, үйлчилгээ үзүүлэх;

6.4.11.тусгаарлагсдын хоол, цайг гал тогооноос хүлээн авч, ажиглалтын өрөөний үүдэнд байрлуулсан ширээн дээрх аяга, тавагны гадаргууд бээлийтэй гараар хүрэхгүйгээр хоолыг хийж түгээх;

6.4.12.хоол түгээж дууссаны дараа хоолны сав, хэрэгслийг гал тогооны бохир хүлээн авах хэсэгт хүргэх;

6.4.13.тусгаарлалтад байгаа хүнд ямар нэгэн зовуур, эмнэлзүйн шинж тэмдэг илэрсэн үед үзлэг хийж, тодорхойлолтод нийцэж байгаа эсэхийг үнэлэх;

6.4.14.тусгаарлалтад байгаа хүнд эмнэлгийн төрөлжсөн мэргэшлийн тусламж, үйлчилгээ шаардлагатай бол харьяалах эрүүл мэндийн байгууллагад яаралтай мэдэгдэж, яаралтай тусламж үзүүлэх;

6.4.15.тусламж, үйлчилгээ үзүүлсний дараа хувийн хамгаалах хувцас, хэрэгслийг зааврын дагуу зөв тайлж, халдвартай хог хаягдлыг шар өнгийн уутанд цуглуулах;

6.4.16.хувийн хамгаалах хувцас, хэрэгсэл өмсөхийн өмнө, тайлсны дараа, ариун цэврийн өрөөнд орсны дараа, хоол идэхийн өмнө гарыг тогтмол угааж, халдваргүйжүүлэх;

6.4.17.тусгаарлан ажиглалтад байгаа хүн заналхийлэх, доромжлох, тавьсан шаардлагыг эсэргүүцэх, биед халдах зэрэг үйлдэл гаргасан тохиолдолд онцгой байдал болон цагдаагийн алба хаагчид нэн даруй мэдэгдэх;

6.4.18.тусгаарлан ажиглалтад байгаа хүний овог, нэр, нас, хүйс, аяллын товч түүх, холбоо барих утас, оршин суугаа гэрийн хаяг, тусгаарлалтад орсон, шилжсэн, гарсан огноо, эрүүл мэндийн мэдээлэл зэргийг УОК-ын Шуурхай штаб, Халдварт өвчин судлалын үндэсний төвийн Шуурхай удирдлагын нэгжийн Google.sheet файлын "Нэмэлт мэдээлэл" талбарт 24 цагийн дотор байршуулах;

6.4.19.тусгаарлан ажиглах байрнаас гэрийн ажиглалтад шилжиж буй хүнд гэрийн ажиглалтад мөрдөх дэглэм, журмыг танилцуулж, баталгааны хуудсыг тухайн хүнээр 2 хувь үйлдүүлж, 1 хувийг өөрт нь, нөгөө хувийг цагдаагийн алба хаагчид хүлээлгэж өгөх.

### **6.5.Тусгаарлан ажиглах байранд ажиллаж буй Онцгой байдлын алба хаагч дараах үүрэг хүлээнэ:**

6.5.1.дотоод үйл ажиллагаанд камерын хяналт тавьж, 24 цагийн турш аюулгүй байдлыг хангах;

6.5.2.хүний эрүүл мэнд, амь насанд аюултай нөхцөл үүсэхээс урьдчилан сэргийлэх чиглэлээр шаардлагатай арга хэмжээг авч ажиллах ба эмх замбараагүй байдал үүссэн тохиолдолд цагдаагийн байгууллагын алба хаагчтай хамтран ажиллах;

6.5.3.галын аюулгүй байдал, аврах зам, гарцын тэмдэг, тэмдэглэгээ, хэвийн ажиллагаанд хяналт тавих;

6.5.4.тусгаарлалтад байгаа хүнд ирсэн эргэлтийн эд зүйлсийг дундын бүс /шар/-ээс авч, эмч мэргэжилтэнд хүлээлгэж өгөх;

6.5.5.шилжилт хөдөлгөөний мэдээг тухай шатны онцгой комиссын Шуурхай штабт өдөр бүр хүргүүлэх;

6.5.6.тусгаарлан ажиглах хүнийг хүлээн авч, байрлуулахад эмч мэргэжилтэнд дэмжлэг үзүүлэх, иргэний санал, гомдлыг амаар болон бичгээр хүлээн авч, тэмдэглэл хөтлөн шийдвэрлүүлэх;

6.5.7.үүрэг гүйцэтгэх хугацаанд өдөр бүр гарсан зөрчил, дутагдлын талаар холбогдох мэдээг УОК-ын Шуурхай штабт 10:00 цаг, 18:00 цаг, 24:00 цагт өгч, тэмдэглэл хөтлөх.

### **6.6.Тусгаарлан ажиглах байранд ажиллаж буй цагдаагийн алба хаагч дараах үүрэг хүлээнэ:**

6.6.1.гадна орчинд хамгаалалтын бүс тогтоож, тэмдэг тэмдэглэгээг нийтэд харагдахуйц байдлаар байршуулан, хэв журам сахиулж, тээврийн хэрэгслийн хөдөлгөөнд хяналт тавьж, зөвшөөрөлгүй хүн, тээврийн хэрэгслийг хамгаалж байгаа объект, бүсэд нэвтрүүлэхгүй байх;

6.6.2.байрны дотоод орчинд камерын хяналт тавьж дэг журмыг сахиулах;

6.6.3.байранд нэвтрэх шаардлагатай эмч мэргэжилтэн, эрх бүхий байгууллагаас зөвшөөрөлтэй албан хаагчийн ажлын үнэмлэх, хүчин төгөлдөр "ПГУ/PCR" шинжилгээний хариуг шалгаж, бүртгэл хөтлөн нэвтрүүлэх;

6.6.4.тусгаарлан ажиглах байранд хориглосон эд зүйлсийг нэвтрүүлэхгүй байх зорилгоор ачаа тээш, эд зүйлсэд үзлэг хийж гэрчээр онцгой байдлын алба хаагчийг байлцуулан тэмдэглэл хөтлөх;

6.6.5.энэхүү журмаар хориглосон эд зүйлсийг тусгаарлан ажиглах байранд нэвтрүүлэхгүй байх бөгөөд буцаах боломжгүй бол бүртгэл хөтлөн түр хадгалж, тусгаарлалтаас гарах үед эзэнд нь хүлээлгэн өгөх;

6.6.6.тусгаарлагдаж байгаа хүнд болон үүрэг гүйцэтгэж буй бусад албан хаагчдад хууль ёсны шаардлага тавьж, гарсан гэмт хэрэг, зөрчлийг таслан зогсоох, энэ талаар тэмдэглэл үйлдэн нэн даруй удирдах албан тушаалтанд мэдэгдэж, өгсөн үүрэг чиглэлийг хэрэгжүүлэх;

6.6.7.хамгаалалтын бүсэд үүрэг гүйцэтгэх хугацаанд өдөр бүр Цагдаагийн ерөнхий газрын Шуурхай штабт 10:00, 18:00, 24:00 цагт мэдээ өгч, тэмдэглэл хөтлөх;

6.6.8.гадаад улсаас Монгол Улсад суугаа Дипломат төлөөлөгчийн газрын эрх бүхий дипломат ажилтныг тусгаарлах тохиолдолд "Дипломат харилцааны тухай Венийн конвенц"-ийн 36 дугаар зүйлд заасныг баримтлах;

6.6.9.энэхүү журмын 6.6.8-д заасан хүний биед болон түүний ачаа тээшинд үзлэг хийх тохиолдолд Монгол Улсын Гадаад харилцааны яаманд мэдэгдэж, тухайн дипломат ажилтныг харьяалах Дипломат төлөөлөгчийн газрын тэргүүн, эсхүл түүний бүрэн эрхт төлөөлөгчийг байлцуулах.

### **6.7.Тусгаарлан ажиглах байранд байрлах этгээд дараах үүрэг хүлээнэ:**

6.7.1.хуваарилсан өрөөнд байрлаж, тусгаарлалтын дүрэм, журмыг мөрдөх;

6.7.2.тусгаарлан ажиглах байранд ажиллаж буй албан хаагчдын хууль ёсны шаардлагыг биелүүлэх;

6.7.3.тусгаарлан ажиглах байранд орохоос өмнө өөрийн эрүүл мэнд байдал, шашны зан үйлээр хориглосон болон харшлах, эм, эмийн хэрэгсэл, хүнсний бүтээгдэхүүний талаарх мэдээллийг урьдчилан мэдэгдэх;

6.7.4.тусгаарлан ажиглалтын хугацаанд "Коронавируст халдвар (КОВИД-19)-ын лабораторийн оношилгооны түр заавар"-т тусгасан сорьц цуглуулах давтамжийн дагуу шинжилгээнд хамрагдах;

6.7.5.өөрийнхөө эрүүл мэндийн байдалд хяналт тавьж, коронавируст халдварын шинж тэмдэг илэрсэн тохиолдолд энэ талаар нэн даруй мэдэгдэх;

6.7.6.бусдын амгалан тайван байдлыг алдагдуулахгүй байж, эмч мэргэжилтэн болон бусад хүнтэй харьцах үедээ амны хаалт хэрэглэж, хүн хоорондын зайг барих;

6.7.7.өрөөний цонхны салхивчийг 2 цаг тутамд 15 минут нээж, агааржуулалт хийж, зааврын дагуу гараа тогтмол угааж, хувийн ариун цэврийг сахих

6.7.8.зааварчилгааны дагуу өрөөний цэвэрлэгээг өдөр тутам хийж, ахуйн хог хаягдлыг хуваарийн дагуу өрөөний үүдэнд гаргаж тавих;

6.7.9.байрны эд хогшлыг зориулалтын дагуу, ариг гамтай ашиглах, тухайн байгууллагын дотоод журамтай танилцаж гарын үсэг зурах;

6.7.10.гадаад улсаас татан авалтаар ирэх хүн тусгаарлан ажиглах байрны нөхцөл, тавих шаардлагыг хүлээн зөвшөөрсөн тохиолдолд тарифын дагуу байрны төлбөрийг урьдчилан төлөх;

6.7.11.коронавируст халдвартай болох нь батлагдсан тохиолдолд өөрийн уулзсан хүн, явсан зам, чиглэлийн талаарх мэдээллийг үнэн зөв мэдээлэх, эмнэлэг болон эмнэлгийн зориулалтаар ашиглах байранд эмчилгээ, үйлчилгээнд хамрагдах;

6.7.12.бага насны хүүхэдтэй тусгаарлагдсан тохиолдолд түүний эрүүл мэнд, аюулгүй байдлыг хариуцах;

6.7.13.тусгаарлан ажиглах байрнаас гарах үед өөрийн ачаа тээшийн гадаргууг халдваргүйжүүлэх бодис бүхий уусмалаар арчиж халдваргүйжүүлэх.

6.7.14.ар гэрээс нь эргэлт өгөх боломжгүй үед тусгаарлан ажиглах байрны эрх бүхий ажилтанд хүсэлт гаргаж зөвшөөрөгдсөн эд зүйлсийг худалдан авч болно.

### **6.8.Тусгаарлан ажиглалтад байгаа хүнд дараах үйлдлийг хориглоно:**

6.8.1.ажилтан, алба хаагчийн хууль ёсны шаардлагыг үл биелүүлэх, доромжлох, заналхийлэх, биед нь халдах, аливаа зүй бус үйлдэл гаргах;

6.8.2.бусдын эрүүл мэндэд хохирол учруулахуйц хурц үзүүртэй эд зүйл, архи, согтууруулах ундаа, мансууруулах, сэтгэцэд нөлөөлөх, халуун бууруулах, өвчин намдаах

эм, эмийн хэрэгсэл, бодис, түргэн гэмтэж, муудах хүнсний бүтээгдэхүүн, олон хүн тоглох тоглоом /хөзөр, хөлөгт тоглоом гэх мэт/ зэргийг авч орох, хэрэглэх, эргэлтээр авах;

6.8.3.өрөөнөөс гарах, өрөөний цонхоор хог, тамхины иш, нус, цэр, шүлсээ хаях болон эд зүйл дамжуулах, бусадтай харилцах;

6.8.4.бусдын амгалан тайван байдлыг алдагдуулах, өдөөн турхирах, буруу ташаа мэдээлэл тараах.

### **Долоо.Тусгаарлан ажиглах байранд эргэлт оруулах ажиллагаа**

7.1.Тусгаарлан ажиглах байранд байгаа хүнд энэ журмын 7.2-т заасан хориглоогүй эд зүйлсийг долоо хоногт нэг удаа эргэлтээр оруулж болно.

7.2.Тусгаарлан ажиглах байранд байгаа хүнд цагаан хэрэглэл, ахуйн болон ариун цэврийн хэрэглэл (шүдний оо, сойз, шампунь, ангижруулагч, саван, гоо сайхны бүтээгдэхүүн, алчуур, ариун цэврийн цаас, живх, амны хаалт, гар халдваргүйжүүлэгч бодис) хувцас, гутал, бичгийн хэрэгсэл, ном, сонин, сэтгүүл, гар утас, сим карт, нэгж, компьютер, техник хэрэгсэл, хүүхдийн тоглоом, чанар, эрүүл ахуйн шаардлага хангасан, зориулалтын савлагаатай, бүрэн бүтэн байдал нь алдагдаагүй, хүнсний бүтээгдэхүүн (талх, нарийн боов, чихэр, цай, кофе, ётон, сүү, тараг, жимс, хүүхдийн сүүн тэжээл, нэмэгдэл хүнс г.м.) хүүхдийн угж, хооллох хэрэгсэл зэргийг гэрэлтдэг уутанд хийж, эд, зүйлсийн жагсаалт, тоо ширхэгийг бичиж оруулахыг зөвшөөрнө.

7.3.Эргэлтийг 10:00-16:00 цагийн хооронд тусгаарлан ажиглах байрны тогтсон нэг хаалгаар хүлээн авна.

7.4.Эргэлтийг эмч мэргэжилтэн, албан хаагчид чирэгдэлгүй, шуурхай зохион байгуулна.

7.5.Эргэлтийн эд зүйлийг цагдаагийн алба хаагч “ногоон” бүсэд хүлээн авч, үзлэг хийн зөвшөөрөгдсөн эд, зүйлсийг завсрын буюу “шар” бүсэд хүргэх бөгөөд энэ журмын 6.8.2-т заасан хориглосон эд зүйлсийг буцаана.

7.6.Цагдаагийн албан хаагч дундын бүсэд эд зүйлсийг байршуулсны дараа онцгой байдлын алба хаагч хүлээн авч “улаан” бүсэд эмч мэргэжилтэнд дамжуулан өгнө.

7.7.Тусгаарлан ажиглах байранд энэ журмын 6.8.2-т заасан эд зүйлийг оруулахыг хориглоно.

### **Найм. Тусгаарлан ажиглах байранд сэжигтэй болон батлагдсан тохиолдол илэрсэн үеийн хариу арга хэмжээ**

8.1.Тусгаарлан ажиглах байранд тусгаарлагдсан хүнд коронавируст халдварын шинж тэмдэг илэрсэн үед хугацаа харгалзахгүй антигенд суурилсан түргэвчилсэн шинжилгээ ажлыг нийслэлд Халдварт өвчин судлалын үндэсний төв /ХӨСҮТ/-ийн шуурхай хариу арга хэмжээний баг, орон нутагт харьяа Эрүүл мэндийн байгууллага зохион байгуулна.

8.2.Нэг өрөөнд тусгаарлагдсан 0-16 насны хүүхэд, эцэг, эх, асран хамгаалагч, харгалзан дэмжигчийн аль нэгээс коронавируст халдвар батлагдсан тохиолдолд эцэг, эх, асран хамгаалагч, харгалзан дэмжигчийг зөвшөөрлийн дагуу эрүүл мэндийн байгууллагад хамтад нь шилжүүлж болно.

8.3.Нэг өрөөнд тусгаарлагдсан гэр бүлийн болон хамт амьдарч, ажиллаж, сурч байсан хүмүүсээс сэжигтэй болон батлагдсан тохиолдол илэрвэл тухайн хүнийг эрүүл мэндийн байгууллагад шилжүүлж, бусад иргэнийг өрөөнд нь тусгаарлан эсэхийг тандалтын багийн дүгнэлтийг үндэслэн тухайн шатны онцгой комиссын Шуурхай штаб шийдвэрлэнэ.

8.4.Голомтын эцсийн халдваргүйжүүлэлт хийх үед тухайн нутаг дэвсгэрийн мэргэжлийн хяналтын байгууллагад мэдэгдэж, хяналт хийлгэнэ.

8.5.Халдваргүйжүүлэлт хийсэн хэсгүүдийг зааврын дагуу угааж цэвэрлэнэ.

8.6.Тусгаарлан ажиглах байрны эрүүл мэндийн ажилтан нь батлагдсан болон сэжигтэй тохиолдлоор эмнэлгийн байгууллага руу хүргэгдсэн хүний мэдээллийг 1 цагийн дотор улсын болон нийслэлийн Онцгой комиссын Шуурхай штабт тус тус мэдэгдэнэ.

8.7.Ганцаараа тусгаарлагдах боломжгүй /өөрийн үйлдлийг хянах чадваргүй, бүрэн бус чадвартай, хөгжлийн бэрхшээлтэй, хүнд өвчтэй, бага насны хүүхэд/ хүний эцэг, эх, асран хамгаалагч, харгалзан дэмжигчийг тусгаарлах байр руу оруулж, хамтад нь тусгаарлаж болно.

8.9.Батлагдсан тохиолдлын эмнэлзүйн хэлбэрийг харгалзан эмнэлэг эсвэл гэрт нь тусгаарлан эмчилнэ.

8.10.Тусгаарлах байранд батлагдсан тохиолдлыг ХӨСҮТ-ийн болон орон нутгийн Шуурхай хариу арга хэмжээний баг тээвэрлэнэ.

### **Ес. Тусгаарлан ажиглах байрны халдваргүйжүүлэлт**

9.1.Урьдчилан сэргийлэх буюу өдөр тутмын халдваргүйжүүлэлтийг мэргэжлийн байгууллагын гаргасан заавар журмын дагуу хийж гүйцэтгэх.

9.2.Тусгаарлалтын нэг ээлж дууссаны дараах халдваргүйжүүлэлтийг мэргэжлийн байгууллагаар гүйцэтгүүлнэ.

9.3.Тусгаарлан ажиглалтад орж байгаа хүнийг тээвэрлэсэн тээврийн хэрэгслийг мэргэжлийн байгууллага халдваргүйжүүлнэ.

9.4.Тусгаарлан ажиглах байрнаас коронавируст халдварын батлагдсан тохиолдлыг шилжүүлсэний дараа тухайн хүний байрлаж байсан өрөө, ажилтны амралтын өрөө, явсан чиглэлийн дагуу коридор, шат, лифт, хаалганы хэсэгт голомтын эцсийн халдваргүйжүүлэлтийг нийслэлд ЗӨСҮТ, холбогдох мэргэжлийн байгууллага, аймагт ЗӨСТ, ЗӨСТ-гүй аймагт Бүсийн оношилгоо эмчилгээний төв, Нэгдсэн эмнэлэг, сум, тосгонд эрүүл мэндийн төв, сум дундын эмнэлэг гүйцэтгэнэ.

### **Арав. Тусгаарлан ажиглах байранд тавих хөндлөнгийн хяналт**

10.1.Мэргэжлийн хяналтын байгууллага нь тусгаарлан ажиглах байранд дараах арга хэмжээг хэрэгжүүлнэ:

10.1.1.тусгаарлан ажиглах байрны эрүүл ахуйн нөхцөл, халдвараас сэргийлэх дэглэм, хоол хүнсний аюулгүй байдлын талаар ирүүлсэн өргөдөл гомдол, удирдлагын шийдвэрийн дагуу болон явцын хяналт шалгалтыг хийж, зөрчил, дутагдлыг илрүүлэх, шалтгаан нөхцөлийг тогтоож, холбогдох арга хэмжээг авах;

10.1.2.тусгаарлан ажиглах байранд хийж байгаа халдваргүйжүүлэлт, цэвэрлэгээнд хяналт тавих;

10.1.3.батлагдсан болон сэжигтэй тохиолдол илэрсэн үед хийх голомтын эцсийн халдваргүйжүүлэлтэд хяналт тавих.

10.2.Шаардлагатай тохиолдолд тусгаарлан ажиглах байрны хөндлөнгийн хяналтыг холбогдох хууль тогтоомжийн хүрээнд тагнуул, цагдаагийн байгууллагатай хамтран хэрэгжүүлнэ.

10.3.Тусгаарлан ажиглах байранд хяналт тавих этгээд шаардлагатай тохиолдолд камерын бичлэгийг ашиглана.

### **Арван нэг. Тусгаарлан ажиглах байрнаас гарсан хог хаягдлыг цуглуулах, түр хадгалах, тээвэрлэх, устгах ажиллагаа**

11.1.Тусгаарлан ажиглах байр, өрөө, хоол үйлдвэрлэл, харуул, үйлчилгээ, хяналтын ажилтны хэсгээс гарах ариун цэврийн цаас, шил, лааз, сав, хайрцаг зэрэг баглаа боодол, хүнсний ногооны хальс, хоолны үлдэгдлийг энгийн хог хаягдлын хар өнгийн уутанд цуглуулна.

11.2.Тусгаарлан ажиглах байранд үүрэг гүйцэтгэж байгаа эмч мэргэжилтэн, алба хаагч болон бусад ажилтны хэрэглэсэн хамгаалах хувцас, хэрэгсэл (нэг удаагийн амны

хаалт, бээлий, халат, нүдний шил, нүүрний хаалт, малгай, гутлын улавч болон тарианы хөвөн, дуслын системийн зүүгүй хэсэг, живх зэрэг)-ийг шар өнгийн уутанд цуглуулна.

11.3.Тусгаарлан ажиглах байранд эмнэлгийн тусламж, үйлчилгээ үзүүлсэн болон гэрийн нөхцөлд эмчилгээ хийлгэхэд хэрэглэсэн тарианы ампул, зүү, тариур зэрэг хурц үзүүр, иртэй хог хаягдлыг аюулгүй хайрцагт цуглуулна.

11.4.Халуун хэмжигч багажийн зай, өдрийн гэрэл, даралт хэмжигч зэрэг хүнд металл агуулсан, хугацаа дууссан, хагарч гэмтсэн, бохирдсон эм, халдваргүйжүүлэх бодис агуулсан сав зэргийг хүрэн өнгийн уутанд цуглуулна.

11.5.Тусгаарлан ажиглах байрнаас гарсан шар, хүрэн өнгийн ууттай болон аюулгүй хайрцагтай хог хаягдлыг өдөрт 1 удаа тухайн байрны хог хаягдал цуглуулах цэгт төвлөрүүлнэ.

11.6.Тусгаарлан ажиглах байрнаас гарсан ахуйн хог хаягдлыг энгийн хог хаягдлын журмаар цуглуулж, хадгалан тээвэрлэж устгана.

11.7.Тусгаарлан ажиглах байрнаас гарсан аюултай хог хаягдлыг нийслэлд тусгай зөвшөөрөл бүхий мэргэжлийн байгууллага, орон нутагт тухайн орон нутгийн эрүүл мэндийн байгууллага авна.

#### **Арван хоёр. Бусад.**

12.1.Ажил үүргийн хувьд олж мэдсэн хувь хүний нууцыг албан тушаалтан задруулахгүй байх үүрэг хүлээнэ.

12.2.Энэхүү түр журмыг зөрчсөн албан тушаалтан, хүн, хуулийн этгээдэд Гамшгаас хамгаалах тухай хууль, “Коронавируст халдвар /КОВИД-19/-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай” хуулийг үндэслэн Эрүүгийн хууль, Зөрчлийн тухай хууль, Төрийн албаны тухай хууль, Иргэний тухай хууль, Захиргааны ерөнхий хуульд заасны дагуу хариуцлага хүлээлгэнэ.